

四庫全書

集部

欽定四庫全書

集部
宋詩紀事卷二十四

詳校官給事中臣鄧文泮

侍讀臣孫球覆勘

總校官進士臣繆琪

校對官典簿臣郭祚熾

謄錄監生臣葉世華

欽定四庫全書

宋詩紀事卷二十四

錢塘厲鶚撰

周延雋

延雋字仲章鄒平人治平間以職方郎中知台

州累遷太常少卿

經臺

幽致極東南清陰潤客衫林深纔辨徑雲滿欲藏巖琴
想山猿伴花憎谷鳥銜孤標如可挹墜橐帳開緘台州志

王詵

詵字晉卿開封人選尚英宗女秦國大長公主
爲利州防禦使以黨籍貶均州歷定州觀察使
開國公駙馬都尉贈昭化軍節度使諡榮安

劉後村西園雅集圖跋云本朝戚畹惟李端愿
王晉卿二駙馬好文喜士世傳孫巨源三通鼓
眉山公金釵隆之詞想見一時風流醞藉未幾
烏臺鞠詩案賓主俱謫而囀春鶯輩亦流落于
他人矣

後唐莊宗廟

代梁繼李號良圖卻惑歌兒便喪軀試拂塵埃覘遺像
元來滿面是髭鬚

侯鯖錄

湖上贈別

并序

余前年恩移清潁道出許昌前途小阻畱西湖之別
館者幾一月常與韓持國范景仁汎舟嘯詠使人頓
忘去國流離之恨也韓公德性溫厚風度高雅固已
可愛范公雖老而精神不衰議論純正白鬚紅面動
輒醺酣時余有所賦詠公即取紅蓮葉命筆疾書初

不經思佳辭麗句頃刻而成坐客莫不驚歎也比聞
朝廷就除端明殿學士以寵之因思方今進任老成
如公者若再起之亦足以厚風俗耳

清影十分月暗香千柄蓮不知從此別高會復何年

奉和子瞻內翰見贈長韻

帝子相從玉斗邊洞簫忽斷散非煙平生未省山水窟
一朝身到心茫然長安日遠那復見掘地寧知能及泉
幾年漂泊漢江上東流不舍悲長川山重水遠景無盡

翠幙金屏開目前晴雲冪冪曉籠岫碧嶂溶溶春接天
四時為我供畫本巧自增損姪與妍心匠構畫遠江意
筆鋒耕徧西山田蒼顏華髮何所遣聊將戲墨忘餘年
將軍色山自金碧蕭郎翠竹夸嬋娟風流千載無虎頭
於今妙絕推龍眠豈圖俗筆挂高詠從此得名因謫仙
愛詩好畫本天性輒口先生疑宿緣會當別寫一匹煙
霞境更應消得玉堂醉筆揮長篇

予瞻再和前篇非唯格韻高絕而語意鄭重相與

甚厚因復用韻荅謝之

憶從南澗北山邊慣見冷雲和野煙
山深路僻空弔影夢驚松竹風蕭然
杖藜芒屨謝塵境已甘老去棲林泉
春籃採朮問康伯夜竈養丹陪穉川
漁樵每笑坐爭席鷗鷺無機馴我前
一朝忽作長安夢此生猶欲更問天
歸來未央拜天子枯荻敢自期春妍
造物潛移真幻影感時未用驚桑田
醉來卻畫山中景水墨想像追當年
玉堂故人相與厚意使嫗母齊聯娟
豈知憂患耗心力

讀書嬾去但欲眠屠龍學就本無用只堪投老依金仙
更得新詩寫珠玉勸我不作區中緣佩服忠言匪論報
短章重次木瓜篇

以上式古堂書考

句

佳人已屬沙叱利義士今無古押衙

許彥周詩話晉卿得罪外謫後房善歌者名嘯
春鶯為密縣馬氏所得後還朝尋訪微知之作
詩云云僕在密縣與馬縉輔遊知之最詳縉輔
在其兄處猶見之西清詩話云過潁昌見之誤
也

章峴

峴治平中廣南西路提點刑獄轉運使

丁未上巳重遊龍隱巖

溪干櫂棹訪巖扉
危磴攀躋不欲歸
垂乳滴聲當佛座
宿雲畱潤在僧衣
聊開禊席臨流水
閒擲文竿到落暉
旅宦天涯甘寂寞
送春無意惜芳菲

桂勝

蔡覲

覲治平中定海縣尉

正覺寺清風軒

在定海縣西北

海風拍枕燈初暗
山雨打窗人正寒
料得此軒秋更好

怒濤推月上闌干

延祐四明志

滿執中

執中字子權廣陵人
治平中為萬壽令

石屏路

石屏月如水
石壁雲不動
閒中歌枕臥
天地同一夢

明月溪

月出溪水清月落溪水黑茫茫溪上人笑與月為客

以上

滁陽志

馬道

道吉州人

啄木

翠翎迎日動紅背響煙蘿不顧泥丸及唯貪得食多纔
離枯朽木又上最高柯吳楚園林濶忙忙爭奈何

翰府名談治平中有為吉水令忘其姓名治邑
嚴酷野人馬道為啄木詩諷之令見詩稍緩刑

時人目曰馬啄木

薛唐

唐鄞人有田閒集

田舍作

世業存五畝家風守二南適情無過睡幽事不妨貪
母老廚增肉朋來樹選柑每慙躬稼穡未及野農諳
甬上者舊集

蕭介夫

介夫字純臣泰和人英宗朝官萍鄉簿

將進酒歌

勸君莫累黑山土累得黑山竟何補
勸君莫勒燕然石勒得燕然又何益
百年歲月能幾何螢燭光中都瞬息
我今安得萬丈梯騰騰直上天街墀
剪折金烏翅截下玉兔蹄使玉兔不
能走金烏不得飛然後舉泰山為肉
林東海為酒池君不見吳下秋風悲
金谷園中春草衰不如相逢且飲酒
齊聲拍掌大唱金縷衣

吉安府志

錢忠

句

滿目生涯千頃浪全家衣食一綸竿

吳郡志治平中錢忠過吳遊賞遙見一好女子
獨棹煙波閒忠悅之贈詩云云女攜詩呈父父
以女妻忠汎舟同入烟波不知所往

錢信

句

安得神仙術試為施康濟使此平望村如吾江子匯

齊東野語錢信平望蟲詩云云吳興獨江子滙
無蟲舊傳馬自然泊舟於此

王安禮

安禮字和甫安石弟早登科累官知制誥翰林
學士知開封府尚書左丞紹聖初罷知太原府
卒有王魏公集

恭和御製上元觀燈

鑾輿清曉出瑤臺羽衛瞻迎扇影開鳳闕張燈天上坐
雞林獻曲海邊來修文可笑秦無策能賦休誇楚有才

星漢未斜鉤樂闕君王宣示萬年杯

瓊林苑賜宴餞留守太尉輒繼高韻

名德曾來重四夷朝廷今日見官儀陪祠自冠三公位
分陝猶為百辟師金谷望塵多眷舊瓊林賜餞盡巫疑
都人喜見旆旌美寧識勳名在鼎彝

以上瀛奎律髓

王安國

安國字平甫安禮弟神宗召試賜第為祕閣校
理呂惠卿引連鄭俠獄奪官卒有集

耆舊續聞熙寧中高麗遣使入貢且求王平甫
學士京師題詠有旨令權知開封府元厚之內
翰抄錄以賜厚之自詣平甫求新著平甫以詩
戲之曰誰使詩仙來鳳沼欲傳賈客過雞林

題滕王閣

滕王平昔好追遊高閣依然枕碧流勝地幾經興廢事
夕陽偏照古今愁城中樹密千家市天際人歸一葉舟
極目滄波吟不盡西山重疊亂雲浮

能改齋漫錄王平甫年十三作

記夢

萬頃波濤木葉飛笙簫宮殿號靈芝揮毫不似人間世
長樂鐘聲夢覺時

冷齋夜話王平甫熙寧癸丑歲直宿崇文院夢
有邀之至海上見海水中宮殿甚盛其中作樂
笙簫鼓吹之妓甚衆題其名曰靈芝宮邀之者
欲俱往有人在宮側隔水謂曰時未至且今去
他日當迎之至此恍惚夢覺時禁中已鳴鐘平
甫頗自命不凡為詩記之

杭州呈勝之

遊覽須知此地佳紛紛人物敵京華林巒臘雪千家水
城郭春風二月花彩舫笙歌吹落日畫樓燈燭映殘霞

如君援筆宜摹寫付與塵埃北客誇

瀛奎律髓云此平甫作誤入荆公集

西湖春日

曰琯按以下二首誤入林逋集

爭得才如杜牧之試來湖上輒題詩
春煙寺院敲茶鼓
夕照樓臺卓酒旗
濃吐雜芳薰
巖嶂溼飛雙
翠破連漪
人閒幸有蓑兼笠
且上漁舟作釣師

春陰

似雨非晴意思深
宿醒牽率臥重衾
苦憐燕子寒相並
生怕梨花晚不禁
薄薄簾帷欺欲透
遙遙歌管壓來沈

北園南陌狂無數祇有芳菲會此心

以上瀛奎律髓

句

海鵬未擊三千里天馬須歸十二閑

茗溪叢話

風暄翠幕

春沾酒露溼筠籠夜賣花

洛中間見前錄

當時徐氏擅筆墨夜圍夢墮空中篋

金玉詩話王師弔伐江左城破或夢卅角女子行空中以巨篋篋物散落如豆著地皆成人問其故曰此當死於難者後見貴人盛冠服繼墮于地云此徐舍人也既寤聞徐錯死圍城中王文公兄弟在金陵和王微之哲登高齋詩押篋字平甫有句云云此事奇謫而屈曲強韻中可

謂搏虎手也

卷二十四

宮殿影搖河漢外江湖夢斷曉鐘邊

館中題壁

忽吟佳句

詩驅暑遠勝前人檄愈風

病中答蘇子容

九月清霜送陶令千

年白日見滕公

王繹學士挽詞

以上隱居詩話

沈遼

遼字睿達錢唐人邁弟用兄任監壽州酒稅熙

寧中以太常寺奉禮郎監杭州軍資庫轉運使

攝華亭縣他使者以夙憾文致其罪下獄奪官

流永州徙池州有雲巢編

金玉詩話遼尤工翰墨登科之後遊京師偶為人書帟帶詞頗不典流傳達于宮禁近幸嬪御服之遂塵乙覽後削籍為民

奉陪穎叔賦鎖院牡丹

昔年曾到洛城中
玉椀金盤深淺紅
行上荆溪溪畔寺
愧將白髮對東風

池陽

寒煙寂寂鎖青谿
圓月亭亭上曲隄
小杜風情遙可想

閒調絲竹舞金泥

陸機宅

朝日欲出已復西人閒興廢那可
知崑山陵谷久已變
水傍惟有將軍碑

龜茲舞

龜茲舞龜茲舞始自漢時入樂府
世上雖傳此樂名不知此樂猶傳
否黃扉朱郎晝無事美人親尋教
坊譜衣冠盡得畫圖看樂器多因
西域取紅綠裯結坐後部長

笛短簫形製古雞娄指鼓舊所識饒貝流蘇分白羽玉
顏二女高髻花孔雀羅衫金畫縷紅鞞玉帶踏筵出初
驚翔鸞下玄圃中有一人奏羯鼓頭如山兮手如雨其
閒曲調雜晉楚歌詞至今傳晉語須臾曲罷立前廡歎
息平生未嘗覩清都閨苑昔有夢寂寞如今在何所我
家家住滄海涯上國樂事殊未知玉顏邀我索題詩它
時有夢與誰期

以上雲巢編

王欽臣

欽臣字仲至洙之子用蔭入官文彥博薦試學士院賜進士及第歷集賢殿修撰知和州徙饒州斥提舉太平觀徽宗立復待制知成德軍卒入黨籍有廣諷味集

宿華岳觀

凌空老樹雲垂葉壓屋梨花雪照人深愧地仙教俗客
慙慙留看華山春

再題華岳觀

石壇流水共蒼苔青竹林閒一徑開可惜梨花飛已盡
前年遊客始重來

以上江都幾雜志

召試學士院試罷作

翠木陰陰白玉堂老來方此試文章日斜奏罷長楊賦
閒拂塵埃看畫牆

西清詩話荆公見之甚歎賞為改作奏賦長楊
罷且云詩家語如此乃健

戲書長老院

蜀國相如最好詞武皇深恨不同時凌雲賦罷還無用

寂寞文園興可知

能改齋漫錄熙寧中王仲至自河北被召用荆公薦對神宗問所與遊從公奏宋敏求帝默然遣任公因留一詩書長老院中云云荆公愛其詩自題於所執扇

與秦少遊于恭敏李公燕閒堂聯句

黃葉山頭初帶雪綠波尊酒暫回春王已聞壁月瓊枝句更著朝雲暮雨人秦老愧紅妝翻曲妙喜逢佳客放懷新
王天明又出桃源去仙境何時再問津
秦能改齋漫錄

次韻蘇子由詠李伯時所藏韓幹馬

天閑不遇頭亦垂真性本不求青絲由來奇骨類奇士
立見俱似囊中錐鳳頭初踏蔥嶺至繡膊東由青海馳
春風宛轉白玉鐙晚日照耀黃金羈李侯對此意匠發
造物真比毫端奇方歎之相豈可擬顛倒未免雄稱雌
翰林相繼寫高韻何止羊何共和之玉花照夜古稱美
顏色乃是論其皮固知神駿不易寫心與道合方能知
文章書畫固一理不見摩詰前身應畫師

聲畫集

使遼回謁恭敏李公席上作

穹廬三月已淹留
白雪黃雲見即愁
滿袖塵埃何處洗
李家池上海棠洲
詩人玉屑

遊王官谷

鐘鼎山林出處明
中間不合枉高情
有錢須買王官谷
流水聲中過一生
王官谷集

安燾

燾字厚卿
開封人
舉進士
神宗朝
歷官同知樞密院事
哲宗朝
拜門下侍郎
落職
知大名府
徽

宗朝知河南降邠州團練副使還洛卒入元祐
黨籍

重題江干初雪圖

事詳韓忠彥詩下

曾遊滄海困驚瀾
晚涉風波路更難
從此江湖無限景
不如祇向畫圖看

石林詩話

韓忠彥

忠彥字師朴琦子以父任為將作監復舉進士
元祐中同知樞密院事徽宗朝進左僕射兼門

下侍郎封儀國公謫磁州團練副使致仕卒入

元祐黨籍

題江干初雪圖

諸公當日聚巖廊半謫南荒半已亡唯有紫樞黃閣老
再開圖畫看瀟湘

石林詩話江干初雪圖真蹟藏李邦直家唐蠟
紙本世傳王摩詰所作元豐間王禹玉蔡持正
韓王汝章子厚王和甫張遠明安厚卿七人題
詩建中靖國元年韓師朴相邦直厚卿同在二
府時前七人者所存惟厚卿而已持正貶死嶺
外禹玉追貶子厚方貶玉汝和甫遠明則死久

矣故師朴題其後云云紫樞黃閣謂邦直在門
下厚卿在西府也厚卿復題邦直亦自題云

駕幸太學

恢崇儒教頓生光
天子親來幸上庠
星弁煌煌環帝座
霜袍密密綴周行
廟祠稽首尊先聖
書義終篇勸嗣王
學道深慙非入室
此辰榮事亦升堂

中州題咏集

許遵

遵字仲塗泗州人第進士熙寧間判大理出知
潤州提舉崇福宮

遊風水洞

水洞連風洞精藍兩洞前山高易藏日樹老不知年
板有華宗什名留少傳篇煙波門外境寂寞變桑田

咸淳臨安

志

沈立

立字立之歷陽人舉進士歷江淮發運使知越
杭二州

英韶在前徒矜下里之曲風雅未喪豈繫擊轅之

音不圖綴綺靡之辭抑將導敦厚之旨耳海棠雖
盛於蜀人不甚貴因暇偶成五言百韻律詩一章
知我者無加焉

岷蜀地千里海棠花獨妍萬株佳麗國二月豔陽天叢
萼勻如布修蕤巧似編彤雲輕點綴赤玉碎雕鐫瑟瑟
光輪瑩猩猩血借鮮淺深相向背疎密遞句牽輕舊重
重染丹砂細細研藥纖金粟拱鬚嫩紫絲拳紅蠟隨英
滴明璣著顆穿初莖爭裊柳翹幹共踰躔絕代知無價

生香不減篴分靈應桂苑鍾粹定星躔木帝經邦相花
王入室賢祥飈如剪拂卿霽共陶甄真宰陰推轂句芒
與著鞭不須憂薄命好為惜流年贊翼施生柄扶持煦
嫗權主張韶令正調燮淑威宣和氣高低洽芳心次第
還金釵人十二珠履客三千雲雨迷巫峽風波怨洛川
娉婷宜住楚妖冶合居燕繡被通宵展華燈徹曙燃橫
披前檻外半出假山巔暗羨遊蜂採偷輸蟻穴沿瘦娥
闕網纖柔怯女蘿纏蓄恨憑誰訊無言只自憐文君酒

壚畔揚子草堂前品格生來別風流到老全繁中生帳
望衆裏見喧聞暄暖精神出清明意態便闌闌鶯對語
兩兩燕高騫天上宜封殖人間偶佇延共櫻園別館與
杏擁斜阡清暖簾爭卷黃昏幕尚褰低籠金轆轤高映
畫秋千忽認梁園妓深疑閨苑仙蔥蔥來蔥園遠遠別
芝田羞隱冥濛霧輕如淡蕩煙乍逢開羽扇初喜下雲
輶彷彿同星屬依稀帶翠鈿五銖衣宛轉七寶帳翩翹
獨立揆霓節成行列彩旃困宜歌虎枕步好襯金蓮舞

定休迴袖妝濃不傅鉛蓋張松鬱鬱茵藉草芊芊馥郁
蘭供夢扶蘇柳伴眠軀輕彌綽約腰細更便嬛姪姮常
顯若幽柔自灑然侍兒羅白芷婢子列芳荃口口濃檀
注腮腮薄粉填鮮圍施葉幄買笑有榆錢旖旎環瑤席
婆娑匝玳筵嬌依屏曲曲泣對露涓涓南陌輕埃蔽東
郊夕照連幾時休縹緲從此識嬋娟是處遺簪珥誰家
不管弦妒姬貪恐失戲稚惜何顛折閃搔頭褪擎樅約
腕揎戴遮鬟上鳳裝壓鬢邊蟬汲引新歡聚消磨忽忽

蠲縱觀湏倒載命宴必加遽翻曲教歌媛更詞送酒船
鄉心須暫解病眼當時痊迨邇來油壁從容住錦韉雅
宜交讓比穠與棣華聯不憤參朱槿寧甘混木棉酴醾
潛失色躑躅敢差肩素奈思投迹天桃耻借負梧桐愧
金井芍藥濫花磚併壓辛夷俗潛排寶馬薦天恩無久
恃人寵莫長專布影交三徑敷榮徧一廛凝眸方矚矚
回首旋翩翩可忍驚颿挫胡煩急景煎珊瑚隨手碎絳
雪繞枝旋拂漢霞初散當樓月自圓飄零隨蠟燭散亂

逐漪漣灼灼龜城外亭亭錦水邊
抱愁應慘蹙有淚即
潺湲午隱迷蝴蝶朝寒怨杜鵑
物情元倚伏人意莫拘
攣擢秀高羣木稱珍極八埏未開獨脈脈憂落固悁悁
別著新文紀重尋舊譜箋共知紅豔好誰辨赤心堅
實合陪朱李根宜灌醴泉栽須憐竹栢樹莫繞烏鵲趾
托膏腴茂當隨富貴遷為多猶底滯因遠尚迤邐客思
易成亂心期未省愆畫思摩詰筆吟稱薛濤牋醉目休
頻送詩情豈易緣薛能誇麗句鄭谷賞佳篇止感芳姿美

那憐託地偏山經猶罕記方志未多傳巧詠憂才竭冥
搜得意闕遐陬寡真賞僻境忍輕捐抽祕慙非據探奇
敢讓先援毫叙名卉聊用放懷焉

海常譜

張舜民

舜民字芸叟邠州人第進士元祐初除監察御
史徽宗朝為吏部侍郎以龍圖閣待制知同州
坐元祐黨貶商州卒高宗追贈寶文閣直學士
自號浮休居士又號斲齋娶陳師道之姊有畫

漫集

畫繼芸叟生平嗜畫題評精確雖南遷羈旅中
每所經從必搜訪題識東南士大夫家所藏名
品悉載錄中亦能自作山水
郡齋讀書志芸叟為文豪重有理致最刻意於
詩晚好樂府百餘篇自序云年踰耳順方敢言
詩百世之後必有知音者

孫公談圃張芸叟謫郴州稅椰多碧蓮根大如盃
張嘗以墨印于詩稿上以詫北人也

西征回途中二絕

靈州城下千枝柳總被官軍斫作薪他日玉關歸去路
將何攀折贈行人

青銅峽裡韋煙路十去從軍九不回白骨似沙沙似雪
將軍休上望鄉臺

東坡題跋舜民通練西事從高遵裕西征回途
中作二絕云云為轉運判官李蔡所奏貶柳州
監稅舜民言官軍圍靈武不下糧盡而退西人
從城上呼官軍漢人兀搽否或仰而答曰兀搽
城上皆大笑西人謂慙為兀搽也

自題畫扇

忽忽西遷不記年二妃祠外橘州前眼昏筆戰誰能畫
無奈霜紈似月圓

鄧正字宅見劉明復所畫麓山秋景

洛陽才子見長沙自識中丹賢未華文武才全皆不試
丹青筆妙更誰加老杉列在皇堂上小景將歸學士家
我有故山常自寫免教魂夢落天涯

題薛判官秋溪煙竹

深墨畫竹竹明白淡墨畫竹竹帶煙高堂忽爾開數幅
半隱半見如自然

贈山人張無惑善畫山水

西征已度故關山
秋雨零零路屈盤
受盡艱辛心不足
解程又展畫圖看
以上畫繼

京兆安汾叟赴辟臨洮幕府南
舒李君自畫陽關圖并詩以送行
浮休居士為繼其後

古人送行贈以言
李君送人兼以畫
自寫陽關萬里情
奉送安西從辟者
澄心古紙白如銀
筆墨輕清意瀟灑
短亭離筵列歌舞
亭亭喧喧簇車馬
溪邊一叟靜垂綸
橋畔俄逢兩負薪
掣臂蒼鷹隨獵犬
聳耳駝驢扶隻輪

長安陌上多豪俠正值春風三二月分明朝雨泥輕塵
客舍青青柳色新主人舉杯苦勸客道是西征無故人
殷勤一曲歌者闕歌者背淚霑羅巾酒闌童僕各辭親
結束韜撻意氣振穉子牽衣老人哭道上行客皆酸辛
唯有溪邊釣魚叟寂寂投竿如不聞李君此畫何容易
畫出漁樵有深意為道世間離別人若箇不因名與利
紅蓮幕府盡奇才家近南山紫翠堆煥赫朱門當巷陌
潺湲流水繞亭臺當軒怪石人稀見夾道長松年自栽

靜鎖園林鶯對語
密穿堂戶燕驚迴
試問主翁在何所
近向安西幕府開
歌舞教成頭已白
功名未立老相催
西山東國不我與
造父王良安在哉
已卜買田箕嶺下
更看築室潁水隈
憑君傳語王摩詰
畫箇陶潛歸去來

聲畫集

紈扇

紈扇本招風
曾將熱時用
秋來挂壁上
卻被風吹動

齊蒙

筆談

感時事戲作

少年辛苦校蟲魚，晚歲雕蟲恥壯夫。
自是諸生猶習氣，果然紫詔盡驅除。
酒閒李賀皆投筆，地下班揚亦引車。
唯有少陵頑鈍叟，靜中吟撚白髭鬚。

韻語陽秋：熙寧四年，荆公預政，罷詩賦，專以經義取士。元祐五年，復用詩賦。紹聖初，以詩賦為元祐學術，復罷之。政和中，遂著于今。士庶傳習詩賦者，杖一百。畏謹者，至不敢作。故芸叟感而賦此。

真州儀真觀

聞說仙鄉接

一作即

瀨鄉閒遊詩侶禮虛皇三潮寶派

通胥浦萬葉靈杉蔽蜀岡天地杳冥供寫像江山迴合
助靈祥五雲送入蓬萊島留與人間作道場

古今詩話揚州揚子縣古白沙鎮也祥符丁酉
公鑄聖祖天尊像遂為真州有儀真觀觀西一
水縈迴南入大江號曰胥浦一日三潮俗云子
胥解劍之所觀之記載使者以像在舟日方午
潮水忽至今有午潮張芸叟詩云云

和喻明仲馬上吹笛

越客思歸黯不平閒持長笛寫秦聲羨君氣海如斯壯

博我詞鋒孰敢爭江上梅花開又落隴頭流水咽還驚
豈知不寐鰥魚眼獨坐山堂對月明

墨莊漫錄喻陟明仲睦州人持節數部政績藹
著雅善散隸尤妙長笛每行按至山水佳處馬
上臨風快作數弄嘗有馬上吹笛詩寄芸雙芸
雙和之云云

東坡先生哀詞并序

我守中山乃公舊國雪浪蕭齋於焉食宿俯察履綦
仰看梁木思賢閔古皆經貶逐玉井芙蓉一切牽復
云云

石與人俱貶人亡石尚存卻憐堅重質不減浪花痕滿酌中山酒重添丈八盆公兮不歸北萬里一招魂

思賢閣古

皆中山後圃堂名

墨莊漫錄東坡帥中山得黑石白脉如孫知微所畫石間奔流盡水之變作白石大盆以盛之激水其上名其室曰雪浪齋公自銘云玉井芙蓉丈八盆伏流飛空漱其根時有英州之命後謫惠州又徙海外故中山後政以公遷謫雪浪之名遂廢元符中始被北歸之命將至吳中張芸叟守中山葺治雪浪齋重安盆石方欲作詩寄公聞公之薨乃作哀詞云云

題木居士

波穿火透本無奇初見潮州刺史詩當日老翁終不免
後來居士欲奚為山中雷雨誰宜主水底蛟龍睡不知
若使天年俱自遂如今已復長孫枝

墨莊漫錄退之所題木居士在今衡州耒陽縣
鰲口寺元豐初年早暵禱之不應縣令析而焚
之僧道符更刻木為形以事芸叟南遷郴州過
而見之題詩于壁

戲作

芝蘭雖好忌當門何況庭前惡土墩
畚鍤纔興雙劍出狐狸盡去老松蹲
百年守冢真堪笑一日開軒亦可尊

安得擲從天外去成都石筍至今存

墨莊漫錄衛州廳事下舊有土勢隆起篠木叢生相傳云古冢也舊有碑其文曰五百年刺史為吾守墓以此前後相承皆畏而不敢慢紹聖元年齊安孫賁公素為守問之左右以是對公命毀去之官吏大恐闔府叩頭以諫公曰藉今土中有賢者骨當以禮法遷之乃為文自祭而除之斷深丈餘了無他異但有二石峯長五六尺堅瘦清潤又有大木之根蟠踞其下羣疑遂定石上有刻云乾符五年五月三日安于此押衙徐諷龍山起此石處得二石刺史李闕題又刻云開寶七年重疊峨嵋山於廳事前于郡齋文會閣移季公之石安置于此刺史慎知禮題時公素方修州治南韶光園重建清冷堂堂成乃移二石于堂下名曰雙石嗟乎慎公移石去季

公之得石凡九十七年公素之破甌冢出石去
慎公又一百二十一年物之顯晦抑自有數第
不知峨嵋之廢乃冢之名自何時也公素一
旦戲笑為之遂釋千百年之感張芸叟有詩云
云公素可謂剛毅正直自信之君子也

過魏文貞公舊莊

破屋居人少柴門春草長兒童不識字耕稼鄭公莊學

菴筆記

宣赦詩

擊鼓填街道傳聲過水濱國嚴三歲祀恩洗萬方春舟

櫟隨南斗衣冠拱北辰
嶺南并嶺北多少望歸人

侯鯖錄紹聖中芸叟入黨籍繫漳州赦書中獨
元祐人不赦為詩云云

九日

一見黃花只自羞
蕭然短髮不禁秋
誰人為整烏紗帽
獨倚西風滿眼愁

合璧事類前集

次長蘆

炎荒往返正三年
重過長蘆古寺前
萬里風波行欲盡
停橈南望一潸然
輿地紀勝

賜資治通鑑呈范淳父學士

通鑑初成賜近臣不遺疎賤布恩均我投淮水五千里
君滯周南二十春東觀汗青身是夢西宮削橐事如新
細思當日修書者祇有三人今一人

荆坡叢話治平中英宗患歷代史繁多難見令
司馬溫公編進起居事蹟請置局辟官薦劉道
原劉貢父又辟范淳父在局書成進上神宗賜
名資治通鑑元豐末進五代記遷公資政殿學
士除淳父祕書省正字為賈時道原已死貢父
方貶官衡州也元祐初溫公還朝作門下侍郎
用宰相蔡持正劄子付下國子監開板令溫公
門下士及館職校讎之板成編賜宰執侍從及

校讎官各以表謝張芸叟詩云云三人謂貢父
道原淳父也

打麥

打麥打麥彭彭魄魄聲在山南應山北四月太陽出東
北纔離海嶠麥尚青轉到天心麥已熟鵲旦催人夜不
眠竹雞叫雨雲如墨大婦腰鎌出小婦具筐逐上壠先
捋青下壠已成束田家以苦乃為樂敢憚頭枯面焦黑
貴人薦廟已嘗新酒醴雍容會所親曲終厭飫勞童僕
豈信田家未入脣盡將精好輸公賦次把升斗求市人

麥秋正急又秧禾豐歲自少凶歲多田家辛苦可奈何
將此打麥詞兼作插禾歌

醖醖

冰肌雪豔映殘春煥日薰風入四隣任是主人能愛惜
也揀一半與游人

真珠花

風中的皦月中看解作人間五月寒一似漢宮梳洗了
玉瓏璫壓翠雲冠

以上函洲鑑類

板子磯

石上紅花低照水
山頭綠篠細含煙
天生一本徐熙畫

祇欠鷓鴣相對眠

太平府志

離真州

日日北風吹上水
年年客思攪新秋
山長水遠連三楚
物態人情又一州
隔岸晚峯如見揖
並船孤鷺似相留
因知景畧非前達
身後猶須具十牛

揚州府志

陶弼

弼字商翁永州祁陽人以功授陽朔縣主簿歷
官知邕州招納諸蠻有功四遷為東上閣門使
康州團練使有集

送趙樞寺丞宰虔化縣

路入虔雲去如何輕解攜人煙五嶺北星斗大江西暖
雪梅花樹晴雷贛石溪青衫欲無淚不奈鷓鴣啼

出嶺題石灰鋪

馬度巖關口生歸喜復嗟天文離峯舌人影背含沙江

勢一再曲梅梢三四花登高休問路雲際是吾家

登崑崙臺

落照古城隅邊風動隼旗久閒忘戰畧多病熟醫書白
髮隨年短新情與世疎桃花春水起還釣舊溪魚

天涯亭

雨色絲絲風色驕天涯亭上覺魂消一家生意付秋瘴
萬里歸心隨暮潮兵送遠人還海界吏申遷客入津橋
山公對此聊酣飲怕見醒來兩鬢凋

以上陶邕州集

寄蘇州徐處士弁弁能畫山水

平南無策鬢如霜七十峯前舊隱鄉
相約祝融孤頂上

借君吟筆畫瀟湘

聲畫集

賓州作

金鼓聲闌劒戟收使君迴上雅歌樓
尊前一闋清商曲
消盡窮邊萬里愁

往歲傳聞南詔檄近時方策伏波城
安城太守知邊計
菑菑花中閱水兵

閣阜山

崇真宮在臨江新淦縣北山形如閣山色如阜故名道書云第二十福地即漢張道

陵丁令威葛孝先修煉之地

萬仞天門閣阜形陰陽不似衆山青
一區海上神仙宅
數曲人間水墨屏
華表鶴歸春谷響
玉京龍起夜潭腥
可憐張葛無人繼
三級高壇拂杳冥

陽朔縣作

榕葉森森蓋縣衙
不離牀衽見煙霞
民耕紫芋為朝食
僧煮黃藤代晚茶
瀑布聲中窺案牘
女蘿陰裏勸桑麻

欲知言偃弦歌處水墨屏風數百家

以上方輿勝覽

端硯贈王欲

端硯如池狀潤疑雲雨通粗官不識字好去伴詩翁

硯箋

寄新沅守謝麟

險盡天開溪路平詩書新將典新城三千戍卒今無幾
十萬屯田古未耕屬縣乞除防虎檻生蠻願獻採砂阮
從茲預擬風塵息盡是仁威下旆旌

辰州府志

山茶

江南池館厭浮紅零落山煙山雨中卻是北人偏愛惜
數枝和雪上屏風

後村千家詩

詠藕

萬頃金波裡誰將玉節裁絲應鮫乞與津是蚌分來盤
貯冰猶結刀侵雪易摧防風骨外折混沌竅中開月寺
僧家鉢風亭酒客杯胸中秋氣入牙角雨聲回自媿塵
泥賤得蒙尊俎陪與君消酷暑瓜李莫相猜

蜨

暖翅玉羅薄香鬚金線微青春二三月白日一雙飛露
重休深入風高且暫歸南園芳樹下燕雀最多機

以上
合璧

事類別集

題柳州柑子堂

柳子厚手植。

子厚才名甲有唐謫官分得荔支鄉羅池水盡黃柑死
獨有穹碑在畫堂

錦繡萬花谷

黃陵廟

溪上龍蛇屋蕭條帝子祠竹痕當日淚山色後人疑仙

服霞留綺新妝月印眉楚民亡水旱簫鼓謝神禧

粵西詩載

句

雪山經夏冷天馬入秋肥

塞上陰

微辨樵火霽早誤僧鐘

行役

渴蜂銜硯水飢蜨嗅餅花

順州

梟鳴社旁樹盜發冢中

金鹿飲沙渾水猿飢果落雲將老未聞金作印師寒

猶用鐵為衣山險不能留霸業水聲惟解送年華

道近可憐驚馬駿時平不見布衣雄

以上後村詩話

蒐兵四解降王縛報國三登上將壇

觀曹武惠畫像
澠水燕談

王令

令字逢原廣陵人王安石愛其才因妻以吳夫人女弟年二十八卒有廣陵集

韓幹馬

天寶天子盛天廐吐番入馬上天壽紫衣牧吏偏坐前
騎入金門不容驟西極苜蓿為誰肥六閑飛黃臥嗟瘦
乾元殿下誰把筆當年人無出幹右傳聞三馬同日死
死魄到紙氣方就鐵勒夾口重兩銜墨絲卓尾合雙紐

天門未上人就觀奚官驚嗟失開口生搜朔野空毛羣
死斷世工無後手當時天子惜不傳送入御府置官守
邊塵勃鬱燕薊來宮闕蕭騷既聞後誰拚千金出手收
足踏萬里避奔走幾經蹂躪道邊塵今日寧無紙上垢
尊前病客不識書但驚骨氣世未有冀北駿足無時無
生不逢幹死空朽世工無手不肯休往往氣骨陋如狗

假山

鯨牙鯢鬣相摩捽巨靈戲撮天凹突舊山風老狂雲根

重湖凍脫秋波骨
我來謂怪非得真
醉揭碧海瞰蛟窟
不然禹鼎魑魅形
神顛鬼脇相撐揆

以上廣陵集

墨莊漫錄夏均父言此詩奇險不蹈襲前人

文同

同字與可梓潼人自號笑笑先生第進士仕至
太常博士集賢校理元豐初出守湖州行至宛
丘驛忽留不行沐浴冠帶正坐而逝有丹淵集

蘇東坡云文與可畫竹初不自貴重四方之人
持繚而請者足相躡于門與可厭之投諸地而

罵曰吾將以為戮材士大夫傳之以為口實及
與可洋州還而予為徐州與可遺余書曰近語
士大夫吾墨竹一派近在彭城可往求之幾材
當萃于子矣書尾後寫一詩其畧云擬將一段
鵝溪絹掃取寒梢萬尺長余謂與可竹長萬尺
當用絹二百五十匹知公僂于筆硯願得此絹
而已因荅其詩曰世間那有千尋竹月落空庭
影許長與可笑曰蘇子辯則辯矣然二百五十
匹吾將買田而歸老焉
石林詩話與可為人靖深不撓世故熙寧初時
論既不一士大夫好惡紛然同在館閣未嘗有
所向背時子瞻數上書論天下事退而與賓客
亦多以時事為讖誚同極以為不然每苦口力
戒之子瞻出為杭州通判同送行詩有北客若
來休問事西湖雖好莫吟詩之句及黃州之謫
正坐杭州詩語人以為知言

退谷消夏錄世傳道臻淨因禪師居都城隅三十年不出戶無所嗜好獨雪方丈四壁請與可畫墨竹謂人曰若使遊人見之心自清涼此君益替我說法也

秦王卷衣

咸陽秦王家宮闕明曉霞丹文映碧
鏤光采相鉤加銅螭逐銀霓壓屋驚
蟠拏洞戶鎖日月其中光景賒春風
動珠箔驚額金窠斜美人卻扇坐羞
落庭下花閒弄玉指環輕冰扼紅牙
君王顧之笑為駐七寶車自卷金縷
衣龍鸞蔚紛葩持以贈所愛結歡期
無涯

容齋四筆云語意深入騷人閭域

王昭君

絕豔生殊域芳年入內庭誰知金屋寵只是信丹青
幾歲後宮塵今朝絕國春君王重恩信不欲遣他人
極目邊沙遠傷心漢月圓一生埋沒恨長入四條弦
容齋四筆云令人讀之縹緲然感慨無已

新晴山月

高松漏疎月落影如畫地徘徊愛其才夜久不能寐怯

風池荷卷病雨山果墜誰伴予苦吟滿林啼絡緯

春閨

枕帶縈春意窓紗漏曉光
蠅蛸傷遠別鷓鴣感流芳
妝匣蒸殘粉熏爐減舊香
洞房燈燭外只有夢悠揚

咏鷺

避雨竹間點點迎風柳下翩
翩靜依寒蓼如畫獨立晴
沙可憐

以上丹淵集

娛書堂詩話云清拔可喜

題上清宮壁

天氣陰陰別作寒夕陽林下動歸鞍忽聞人報後山雪

更上上清宮上看光學菴筆記

錢勰

勰字穆父易之孫彥遠之子居崇德州錢里以
從父明逸任元祐初歷龍圖閣直學士知開封
府拜翰林學士出知池州入元祐黨籍

宋史本傳勰知開封臨事益精蘇軾乘其据案
時遣之詩勰掃筆立就以報軾曰電掃訟庭響

答詩簡近所未見也

老學菴筆記錢穆父風姿甚美有九子都下九子母祠作一巾紵美丈夫坐于西偏俗以為九子母之夫都下謂穆父為九子母夫東坡贈詩云九子羨君門戶壯蓋戲之也

以米二碩送秦少游作二十八字

儒館優賢蓋取頤校讐尤自困朝飢西鄰為祿無多少
希薄才堪作淖糜王直方詩話

和閤老舍人曝書會

天祿圖書府芸籤歲曝頻
幡經窮藏室賜會集儒紳
顧

陸高標好鍾王妙入神可無鉛槧吏來預石渠賓

事文類聚

後集

送奉使鈐轄高侯之任成都

烈士由來不徇名西南萬里不留行
熊羆訓整屯千計尊俎雍容鎮百城
閩外使華新報聘山西家法舊論兵
封侯富貴須由命請訪沈冥賣卜生

合璧事類後集

和辨才法師新亭初成詩韻

幻泡昧空色真夢遊黃丘
宦學類狂走爾來三十秋
齒

髮非他時歲月不我留古刹插亂石蟄龍蟠霞湫天人
大導師駐錫今白頭安住差護念晚節非沈浮昔嘗謂
出處未用相劣優權衡分二智股肱均九流今知援
者詎得逍遙遊從茲許禮足尚可治幽憂

天竺寺志

劉淑

淑神宗朝以朝請大夫守蘇州

題虎丘

袞席頻虛未賜環遊心暫寄水雲閒霓旌初下姑蘇苑

蠟屐先尋虎阜山高興不辭溪路險幽情更羨野僧閒
留連景物慵回首畫舫寒侵暮角還

虎丘志

王仲敏

次劉公遊虎丘韻

松陰嵐影翠回環盡在牆垣繚繞閒舟楫更無通別浦
煙霞曾不接他山詩亡石在雲徒恨劍去池荒水自閒
偷得公餘來一晌遙城鐘鼓出催還

虎丘志

崔靜

游桂林伏波巖和章提刑峴

古木纏溪出老根四時香火廟空存人家曉聚鳬鴨亂
水怪夜翻星斗渾靈洞仙游雲自鎖陰崖龍去石生痕
幸同軒從乘餘興酣醉清時酒一樽

名勝志

葉祖洽


祖洽字敦禮邵武人熙寧庚戌進士第一終集

賢殿修撰

句

已分桂葉爭雲路不負榴花結露枝

海錄碎事卽武郡庭有石榴一株士人視結實之多少以為登科之信熙寧庚戌歲有雙實於本末者又有附枝而雙實者是歲葉祖洽上官均名在一二何與均兄弟同榜祖洽有句云云



宋詩紀事卷二十四

欽定四庫全書

集部

宋詩紀事卷二十五

詳校官給事中臣鄧文泮

侍讀臣孫球覆勘

總校官進士臣繆琪

校對官典簿臣郭祚熾

謄錄監生臣葉世華

欽定四庫全書

宋詩紀事卷二十五

錢塘厲鶚撰

晁端友

端友字君成，迴四世孫。无咎之父，第進士為杭

州新城令，有新城集。

葉石林云：外祖晁君成，善詩。蘇子瞻所謂清厚靜深，如其為人者也。

黃庭堅撰：晁君成墓志銘。晁氏世載遠矣，而中微有諱迴者，事某陵為翰林學士，承旨以太子少保致仕。諡文元，生執政，開封晁氏始顯。君成曾王父諱迪，贈刑部侍郎；王父諱宗簡，贈吏部

尚書父諱仲偃庫部員外郎刑部視文元母弟
也君成夫人楊氏生一男則補之以元豐甲子十
月乙酉葬君成于濟州任城之呂原

宿濟州西門外旅館

寒林殘日欲棲烏
壁裏青燈乍有無
小雨悵悵人不寐
臥聽羸馬齧殘芻

合璧事類續集

馬處厚席上探得早梅

嶺梅何處早雪裡看芳菲
北陸寒猶在南枝春已歸
曉妝初見妒殘角未成飛
引我江頭夢清香憶滿衣

瀛奎律髓

甘露寺 寺有石如臥羊謂之很石

北固山頭寺風煙昔縱觀
臥亭秋石很環舍海濤寒
越舶樓前聚江楓戶外丹
最宜清夜月虛閣憶盤桓

早行

馬上鷄初唱天涯星未稀
驚風時墜笠零露暗霑衣
山

下踈鐘發林梢獨鳥飛
遠峰煙靄澹迤邐見朝暉

以上文翰

類選

齊廓

廓字公廓會稽人舉進士第歷三司度支判開
封府出為江淮轉運使積官至光祿卿祕書監
卒

寶林寺

峯勢聳如龜簷牙照錦翬路盤危磴出僧觸斷雲歸萬
井分塵界千巖列翠圍浮生任多事到此合忘機越詠
如歸亭

翬飛綺構成賓至得佳名岫列千螺出江涵匹練平吟

看客帆度坐見釣舟橫獨倚雕闌外令人心骨清

吳江縣志

李奉世

句

珠鞍昔御恩猶在玉輦親扶事已非

石林詩話神宗皇帝天性儉約奉慈壽宮尤盡孝道慈聖太后嘗以乘輿服物未備因同天節作珠子鞍轡為壽神宗一御于禁中後藏去不復用一日與兩宮幸後苑賞花慈聖輦至神宗即降步親扶慈聖出輦屢卻不從聞者太息慈聖上仙李奉世時為侍郎進挽詩云云蓋記此二事神宗覽之泣下

曰璐按二句孔平仲談苑作王存但小異耳今

兩存之

李行中

行中字無悔本雲川人徙居松江高尚不仕獨
以詩酒自娛晚治園亭號醉眠東坡居士與之
遊

賦佳人艷梅圖

螭眉鴉髻縷金衣折得梅花第幾枝艷盡餘香不回面
思量何事立多時

中吳紀聞云意尚深遠

自詠醉眠亭

簷低檻曲莫嫌隘地僻草深宜晝眠
代枕暮憑溪上石當簾時看屋頭烟
倦遊拂壁畫山逕貪醉解衣還酒錢
一水近通西浦路客來猶可棹漁船

寄韓憲仲廷評

野徑荒亭草沒腰一眠聊以永今朝
放懷不管人間事破夢時聞夜半潮
冰柱劉叉詩未厭金龜李白酒難招

知君有意尋安道咫尺何時動畫橈

以上至元嘉禾志

韓宗文

題李無悔醉眠亭

得酒休論飲得仙醉中遺物為神全世閒反覆無窮事

吏部難忘抱甕眠

松江府志

蘇杭

題李無悔醉眠亭

趁陽渴鹿背清泉之子名亭取性便適意中閒卻無事

期君忘醉亦忘眠

松江府志

晁端佐

題李無悔醉眠亭

蕭洒松陵江上亭
醉來一夢遊雲屏
生前笑語君須惜
世事紛紛不用醒

至元嘉禾志

關景山

景山字彥瞻景仁弟舉進士

題李無悔醉眠亭

杜老顛狂尋酒伴，經旬出走只空牀。
輸君縱飲還高臥，長有生涯在醉鄉。
至元嘉禾志

母沆

沆太常少卿

遊王官谷

不污唐家亂，蕭然表聖居。
泉聲與山色，相得共清虛。
熙寧

戊申歲冬至虞鄉縣令俞充書
王官谷集

王覲

觀字明叟如臯人第進士哲宗朝擢右正言進
司諫徽宗朝遷御史中丞改翰林學士安置臨

江軍卒入黨籍

望日與諸公會于大慈聞海雲山茶合江梅花開
遂相邀同賞雖無歌舞實有清歡因成拙詩奉呈
野寺山茶昨夜開江亭初報一枝梅旋邀坐上逍遙客
同醉花前潏潏杯秀色霜濃方潤澤暗香風靜更徘徊
仙姿莫遣常情妒不帶東山妓女來

成都文類

胡宗師

和王公覲賞海雲山茶合江梅花

錦水黃金密印開東南時望滯鹽梅得隨劒外同為客
幸逐花前醉倒杯白玉蘂高枝瘦碧燕支萼嫩葉低徊
綺羅不識清詩骨須趁春風摸石來

成都文類

徐彥孚

和王公覲賞海雲山茶合江梅花

萬蘂山茶傍臘開一番春信入江梅追遊共按黃金轡

縱賞還傾白玉杯
濃豔迎風香斷續
疎枝橫月影徘徊
隼旗不負登臨興
更約攜朋載酒來
成都文類

吳師孟

師孟字醇翁成都人

成都記吳師孟張商英張唐英善書天覺喜草而不工東坡戲之所謂脫帽風流餘長史是也

和王公覲賞海雲山茶合江梅花

何處珍叢最早開
海雲山茗合江梅
忽傳詩帥邀膚使
不用歌姬侍宴杯
曉豔鮮明同綺靡
晚妝清淡奉徘徊

此時文酒風流事
宜似臨江放蕩來

成都運司園亭詩

和章質夫

翠錦亭

東閣治臺政
西堂備燕飲
介于二堂閒
華構饒花品
紅紫鎮長春
四時如活錦
公暇一繩牀
上有通中枕

茅菴

結茅為園屋
環堵不可牖
齋居如雁堂
廣長纔六肘
深藏子猷竹
不植陶潛柳
勿起滅定心
宴坐空諸有

以成都

文類

徐介

介陽翟人官屯田

過杜工部墓

水與汨羅接天心深有存
遠移工部死來伴大夫
魂流落同千古風騷共
一源江山不受吊寒日
下西原

王得臣廕史熙寧初調官
汨報慈寺陽翟徐秀
才出其父屯田詩清苦
平淡有古人風其過杜
工部墓一首云云

胡璞

璞字器之南平人熙寧三年進士

經采石渡

抗議金鑾反見讐一抔蟬蛻此江頭當時醉弄波閒月
今作寒光萬里流

輿地紀勝蘇子瞻見之疑唐人作嘆賞不已

陸佃

佃字農師越州山陰人熙寧三年擢甲科徽宗

朝仕至吏部尚書拜尚書右丞罷知亳州卒入
黨籍有陶山集

送人之潤州

丹青太守舊名卿騎竹兒童夾道迎
醉尹笙歌添酒病
謫仙風月苦詩情
江湖天地農桑早
水竹人家枕簟清
白首懷君心未已夢魂猶繞鳳皇城
詩林萬選

贈別吳興太守中父學士

蓬山仙子任天真乞領南麾奏疏頻
金鎖闕邊辭黼座

水晶宮裡約朱輪公庭事簡煩丞掾齋閣詩多泣鬼神
莫為行春戀苔雪鑿坡揮筆待詞臣 瀛奎律髓

句

棠棣行中排宰相梧桐名下識韓家

能改齋漫錄韓子華兄弟皆為宰相門有梧桐
京師人以桐木韓家呼之以別魏公也子華下
世陸農師作挽章云云蓋紀實也

鄧忠臣

忠臣字謹思長沙人熙寧三年進士仕至考功

卽坐元祐黨廢有玉池集

考校同文館戲贈子方兼呈文潛次无咎韻

五年坎壈哀南方江湖魏闕兩相忘
洞蘿巖桂蹇孤芳月潭風渚儔漁郎
單闕孟夏草木長望都樓觀鬱蒼蒼
忠臣癸亥六月以家艱誰令焚芟辭楚狂復來上君白
去國丁卯四月還省

玉堂黃門戟曜羽林槍未央引籍班胡羌雲屯錦膊馬
斯臧大官日膳瓊為糧追隨威鳳鳴高岡豈敢偃息復
在牀投鈴歸休下殿傍衛士傳詔來如驤館閭闔外西

城隍書橐迫遽不及裝顧俊士集要言揚得弓勿問何

人亡趙璧既入秦城償穎脫喜見錐出囊同人于野不

擇鄉戕戕羽翮整顏行金闕玉勒皆驕驕伯喈懷牘望

金商

天啓

魁梧奇偉值子房散家今數術應帝王

天啓

三英

粲粲日爭光我輒與之較雌黃芳菲滿室蘭生香坐堂

月久秋氣涼將軍思歸歌撫觴舒倚梧目送雁南翔想

見葭莢水中央洞庭河漢遙相望香楓葉老赤染霜感

槩少日七步章長安城西約鄭莊

予與子方

潛天啓

嘗有此約

牽

文

牽

牽

牽

牽

牽

率不往有底忙人生可意乃吉祥快馬劃過小苑牆入

門爛醉銀瓶漿秦箏趙瑟喜高張

同文館倡和詩

邯鄲道中夜行阻風

欲瀉懸河雨先號拔樹風問津厖吠處覓路電光中徒
御憂羣盜兒童笑拙翁當知步兵哭初不為途窮

瀛奎律髓

蔡京

京字元長興化軍仙遊人熙寧三年進士歷尚
書右僕射轉司空累封魯國公加太師徽宗朝

凡四入相靖康中再被貶死于潭州

清波雜志蔡京死潭州數日不得殮豪葬漏澤園以青布條裹尸初宣和年間京師染坊有名太師青者茲其識也

題保和殿壁

瓊瑤錯落密成林檎竹交加午有陰
恩許塵凡時縱步不知身在五雲深

侍宴保和殿命賡補成篇

保和新殿麗秋暉恩許塵凡到綺闌
雅興酒酣添逸興

玉真軒內見安妃

見安妃像

玉真軒內暖如春
只見丹青未見人
月裏嫦娥終有恨
鑑中姑射未應真

碧湖雜記東都宣政間禁中有保和殿殿西南
廡有玉真軒軒內有玉華閣即安妃妝閣也妃
姓劉氏入宮進位貴妃林靈素以左道得幸謂
上為長生帝君妃為九華玉真安妃每降神別
置妃位畫妃像其中每祀像妃方寢而覺有酒
容是時羣臣唯蔡元長最承恩遇嘗賦詩題殿
壁云云侍宴于保和殿上令妃見京先有詩命
京賡補成篇須臾命京入軒見妃像京又有詩

云云已而至閣妃出見京勸酬至再日暮而退

與范謨叔飲西園

一日趨朝四日閒荒園薄酒願交驩三峰崛起無平地
二派爭流有激湍極目榛蕪唯野蔓忘憂魚鳥自波瀾
滿船載得主璋重更掬珠璣洗眼看

墨莊漫錄范致虛謨叔與蔡元長相忤久處閒
散宣和初自唐州方城召還提舉寶籙宮未幾
執政時元長以五日一造朝居西第乃與謨叔
釋憾一日觴于西園主禮勤渥元長作詩見意
三峰二派指王黼林靈素梁師成輩方盛也

恭和御製己亥十一月十三日南郊祭天齋宮即
事賜詩

雪晴至日日初南帝舉明禋祀事嚴萬瓦溝中寒色在
一輪空外曉光遲雲和龍軫開冰轍風暖鸞旗拂凍簷
共喜天心扶聖德珠璣更誤寵恩霑

題神霄宮

下馬神霄第一回晴空宮殿九秋開月中桂子看時落
雲外仙輶特地來

以上揮塵餘話

詔賜南園贈親黨

八年帷幄竟何為更賜南園寵太師堪笑當時王學士

功名未有便吟詩

中吳紀聞南園乃廣陵王舊園中有流杯旋螺
亭亞于滄浪之景王黃州為長洲時無日不攜
客醉飲嘗賦詩云他年我若功成後乞取南園
作醉鄉今園中大堂遂以醉鄉名之大觀末蔡
京罷相欲東還詔以其園賜之京即以詩贈親
黨云云黃州之詩不過寓意耳京遂以無功名
誚之黃州雖終為黜臣其名與天地同不朽矣

寄子攸

老嬾身心不自由，封書寄與淚橫流。
百年信誓當深念，三伏征途盍少休。
目送旌旗如昨夢，心存關塞起新愁。
緇衣堂下清風滿，早歸來醉一甌。

獨醒雜志：燕山招納之舉，多出於蔡攸。王師敗于白溝，河元長以詩寄攸，云云。稍傳入禁中，徽宗命京進呈。上閱畢，曰：「三伏征途，不若改作六月。」王師觀此，則是舉非惟當時人知其非，雖其父亦知之矣。

別寵姬

為愛桃花三樹紅，年年歲歲惹東風。
如今去逐他人手，

誰復尊前念老翁

揮塵後錄蔡元長既南遷中路有旨取所寵姬慕容邢武者三人以金人指名來索也元長作詩以別云

句

龍燭影中猶是臘鳳簫聲裏已吹春

春帖子話

西清詩

蔡卞

卞字元度與兄京同年登第王安石妻以女因從之學元豐中以薦為國子直講徽宗朝累擢

知樞密院加觀文殿學士拜昭慶軍節度使政
和末謁歸上冢道死紹興初追貶單州團練副
使

贈華陽法師

師到華陽洞仙花幾度開祇應常救物卻遣世人來
茅山志

汪泌

東湖共樂堂

臨海城東湖氣象清且奇無風綠色淨十頃澄琉璃中有共樂堂今其名者誰或人荅我問太守下車時訪民所疾苦民曰水最危其水或暴至城壞民流屍公謀得上策疊石金城基外遣數百家室屋鱗參差水至無所障適與漂溺期又欲隄其東苦乏土石資開湖足取用隄勢橫虹霓湖光占空濶物從鑑中窺紫翠前後山環列如屏幃結堂就虛曠與俗同遊嬉太守宴堂上遊人歌水湄歌云從公來除患補瘡痍況有此壯觀不樂復

何為有如登春臺人心舉熙熙從事能文者作辭書之
碑底幾不朽功上徹堯軒墀

台州府志台之東湖地初為水軍營熙寧四年
郡守錢暄始開為湖中有共樂堂流杯亭諸勝
汪泌有詩

錢暄

暄字戴陽惟演子以父蔭累官駕部郎中知台
州拜寶文閣待制卒子景臻尚秦魯國大長公
主

題東湖共樂堂

疏就湖山秀氣濃
花林茂列景爭雄
管弦交奏客懽合
臺榭競登人喜同
環障鷺行飛早晚
平波魚陣掠西東
荒蕪芟去成佳致
換得汀洲月與風

台州府志熙寧四年暄守台州累石修城以水
至漂溢鑿湖以受衆水凡一萬六千步有共樂
堂流杯亭在湖心詩云云

晁端禮

端禮字次膺熙寧六年進士兩為縣令忤上官

坐廢晚以承事郎為大晟府協律有閒適集

能改齊漫錄政和間大晟樂成恭元長以次膺
薦詔乘驛赴闕次膺至都會禁中嘉蓮生遂屬
詞以進名並蒂芙蓉上覽之稱善除大晟府協
律郎不克受而卒

絕句

去日玉刀封斷恨見來金斗熨愁眉
黃昏飲散歌闌後
懊惱水邊樓上時

侯鯖錄次膺薄游南京嘗作詞云花前月下堪
垂淚水邊樓上總闌心後過其家已與客飲復
作詩云云

句

尋常自是司空慣咫尺寧憂丞相嗔

漫叟詩話次膺即席贈妓句雅不減張祜散子裏手之作

晁端受

瑯琊翠微亭

曉風吹落秋泉聲夜雨洗出秋山色上有樓臺深翠微

可惜丹青圖不得

滌陽志

晁端彥

端彥字美叔官祕書監

龍湫觀瀑

萬丈龍湫水飛流翠壁開始疑河漢落翻若海潮來飄
灑四時雪喧聞萬壑雷廬山吾未到氣象勝天台

雁山志

晏幾道

幾道字叔原號小山殊幼子監潁昌許田鎮能
文章尤工樂府有臨淄公風子溥字慧開靖康
初官河北與妻王牒趙氏死難

與鄭介夫

小白長紅又滿枝
築毬場外獨支頤
春風自是人閒客
張主繁華得幾時

侯鯖錄熙寧中鄭俠上書事作下獄惡治平時
往還厚善者晏叔原皆在數中俠家搜得叔原
與俠詩裕陵稱之即今釋出

戲作示內

生計唯茲挽般擎
豈憚勞造雖從假
合成不自埏陶阮
杓非同調顏瓢底
共操朝盛負餘米
暮貯藉殘糟幸免

墻間乞終甘澤畔逃挑宜筇作杖捧稱葛為袍儻受桑
閒餉何堪井上螭綽然真自許曄爾未應饗世久輕原
憲人方逐子敖願君同此器珍重到霜毛

墨莊漫錄叔原聚書甚多每有遷徙其妻厭之
謂叔原有類乞兒搬漆椀叔原作詩云云

題司馬長卿畫像

犢鼻生涯一酒壚當年嗤笑欲何如窮通不屬兒曹意
只有真人愛子虛

觀畫目送飛雁手提白魚

眼看飛雁手攜魚似是當年綺季徒仰羨知幾避繒繳
俯嗟貪餌失江湖人閒感緒聞詩語塵外高蹤見畫圖
三嘆繪毫精寫意幕冥傷酒兩躊躇

公儀招觀畫

初約看花花已盡重親閒客客應歡真花既不能長豔
畫在霜紈更好看

以上聲畫集

七夕

雲幙無波斗柄移鵲慵烏慢得橋遲若教精衛填河漢

一水還應有盡時 合璧事類前集

賀鑄

鑄字方回衛州人孝惠皇后族孫娶宗女受右
班殿直元祐中李清臣奏換通直郎通判泗州
太平州卒有慶湖遺老集

王直方詩話方回言學詩于前輩得八句云平
淡不涉于流俗奇古不鄰于怪癖題詠不窘于
物義敘事不病于聲律比興深者通物理用事
工者如己出格見于成篇渾然不可鑄氣出于
言外浩然不可屈盡心于詩守而勿失
老學菴筆記賀方回狀貌奇醜俗謂之賀鬼頭

喜校書朱黃未嘗去手詩文皆高不獨工長短句也有二子曰房曰廩於文房從方廩從回蓋寓父字於二子名也

望夫石

亭亭思婦石下閨幾人代蕩子長不歸山椒久相待微雲蔭髮彩初月輝蛾黛秋雨疊苔衣春風舞羅帶宛如姑射子矯首塵冥外陳迹遂無窮佳期後莫再脫如魯秋氏妄結柔下愛玉質委淵沙悠悠復安在

茗溪漁隱叢話方回因此詩以得名交遊間無不愛之

客有攜冠菜公真挂于驛舍傍題云今作閻羅王
慨然有作

凜凜英風萬世孤忽瞻容貌涕洟俱遺謀不媿生張說
異事猶煩鬼董狐黑白已分歸節義丹青長在懾奸諛
不煩揺扇蒼蠅去一片寒冰挂座隅

和彭城王生悼歌人盼盼

盼盼馬氏善書染死葬南臺即鳳皇原也

東園花下記相逢倩盼偷回一笑濃書簾尚緘香豆蔻
鏡奩初失玉芙蓉歌闌燕子樓前月魂斷鳳皇原上鐘

寄語虞卿謾多賦九原無路達魚封

茅塘馬上

壯圖忽忽負當年回羨農兒過我賢
水落陂塘秋日薄
仰眠牛背看青天

題定林寺

破冰脈漱籬根壞衲遙疑挂樹猿
蠟屐舊痕尋不見
東風先為我開門
以上慶湖遺老集

詩人王屑王荆公見此詩大相歎賞由此知名

鄔柄

柄字德久晉陵人

鑑湖先生未老挂冠以詩卜居于姑蘇毘陵兩郡
依韻奉和

清監風流賀季真先生端是昔人身如何未老催歸去
要臥烟霞兩郡春

慶湖遺老集附

王雱

雱字元澤安石子未冠舉進士歷官龍圖閣學

士早死

趙緊見聞雜錄王雱丞相之次子有心疾娶龐氏不睦丞相離而嫁之時候叔獻死其妻悼箔不修丞相表其事而斥去時人語曰王太祝生前嫁婦侯工部死後休妻

鍾山絕句

當年睥睨此山阿欲著紅樓貯綺羅今日重來無一事
卻騎羸馬下陂陀

許彥周詩話此王雱詩直不為荆公所喜然詩實可傳

關山篇

萬馬度關山關山三尺雪馬盡雪亦乾沙飛石更裂歸
來三五騎旌旗暎雲滅不見去時人空流磧中血

絕句

一雙燕子語簾前病客無慘盡日眠開徧杏花人不到
滿庭春雨綠如烟

霏微細雨不成泥料峭輕寒透袂衣處處園林皆有主
欲尋何地看春歸

以上後村詩話

翠雲寺

寺古無鄰家千山抱虛碧門開猿鳥路殿鎖烟霞積老
木森回溪飛湍自淙激曾無車馬到絕境聞今昔逍遙
賢大夫肯此攜佳客鳴騶清曉來歸時日常反不使訟
庭空誰能傲泉石

撫州府志

袁點

點字師與無錫人熙寧初太學直講

呈東坡先生

青葢美人回鳳帶繡衣男子返雲車上天一笑渾無事

從此人間樂有餘

王熙新志東坡南遷北歸次毘陵時久旱得雨
有里人袁點呈一絕云云坡見大喜為之重寫
且以手簡裒之今袁氏刻石藏之于家

藍奎

奎字秉文潮州程鄉人第進士官郡博士

句

嬾思身外無窮事願讀人間未見書
廣東通志

周諤

諱字希聖尤溪人熙寧六年進士知新會縣不肯奉行新法求歸著孟子解義禮記說門人稱

周夫子

寄子弟

浪有虛名落世間自慙無實骨毛寒末年三十力先倦
纔得一官心已闌卜宅擬尋栽藥圃買田宜近釣魚灘
他年子弟重相見藜杖蓑衣筍箨冠

谿山餘話

周述

述遂昌人熙寧癸丑進士官太常卿

吳臯東作屏山草堂四首之一

天設名區擁翠屏
草堂風度晚鷄聲
年來不作繁華夢
飯犢郊原學耦耕

處州府志

關澥

澥字子容景仁子熙寧六年進士餘杭令

絕句

野艇歸時蒲葉雨
綠車鳴處棟花風
江南舊日經行地

盡在于今醉夢中

寺官官小未朝參
紅日半竿春睡酣
為報鄰鷄莫驚起
且容殘夢到江南

春渚紀聞閻氏詩律精深妍妙世守家法此子容詩世傳以為東坡先生作非也

遊九鎖

山下寒流咽細泉
曉林浮日自生烟
九峯密鎖疑無路
五洞潛通別有天
羽客依山多得道
昔人涉海漫求仙
我來要學棲真事
願借孤雲一榻眠

洞霄詩集

曾旼

旼字彥和龍溪人熙寧六年進士監潤州倉曹

嘗纂潤州類集

次韻趙仲美表弟西齋自遣

知滁州作

謫守淒涼臥郡齋夫君失意偶同來
海邊故國渺何許城上新樓空幾回
寧羨一囊供鶴料會看千里躍龍媒
清吟未免縈機慮只恐飛觴便見猜
自注云唐幕官傳謂之鶴料今歲敕頭所得止此仲美省試下第故云
墨莊漫錄

遊九鎖

山勢盤紆是幾重
溪行亂石水溶溶
東西路口分雙洞
蒼翠羣中起一峯
石上仙翁留去跡
壁間羽客有吟蹤
夜分不是紅塵境
清夢回時曉殿鐘

洞霄詩集

龔程

程字信民
宗元子
熙寧六年進士
歷西安丞
桐廬令

中吳紀聞
信民嘗憤聖道不明
排異端之學家
不置
釋老像祭祀未嘗焚紙錢
儒家甚宗之讀

書攻苦食淡手未嘗釋卷記問精確鄉人號為
有脚書廚

題壁

月度疎櫺起更慵坐聽澄照五更鐘卻思湖上西風急
吹送山前萬箇松

中吳紀聞

常安民

安民字希古邳州人熙寧六年進士元祐初為
宗正丞除監察御史謫監滁州鹽酒務改通判
鄆州入黨籍

題醒心亭

我愛昌黎湖上句醉來直上醒心亭宿醒不待山風解

臥讀殘碑已自醒
錦繡萬花谷

孫諤

諤字元忠睢陽人熙寧六年進士累官右正言
以直龍圖知廣德軍徽宗朝遷左司諫卒入元

祐黨籍

資聖院
在遂寧小溪

四山藏一寺方丈壓諸峯回首坐禪處白雲深幾重全蜀藝文志

劉涇

涇字巨濟簡州陽安人熙寧六年進士王安石薦為經學所檢討歷國子監丞知處虢真坊四

州元符末上書召對除職方郎中卒有前溪集

鄧椿畫繼云涇為米元章畫友善作林石槎竹筆墨狂逸體製拔俗

和米元章龍真行

祕府右軍書一卷有龍形真字印故作

秦火蕩焚天地赤孔堂壞後無餘壁不知科斗六書文
化作龍蛇二王跡集賢他日作仙久官姓篆章存歷歷
自憐黃眼未親逢一段因依徒奪魄元章揮灑早驚動
祕篋墨皇曾敬識孤標未要後生知劣許下官論莫逆
好奇舉世不多得神物尤來終變易神鋒雙合會有時
真璽一飛無處覓頗聞祕篋作訛語別有擾龍招異客
不如乾沒歸去來勝在箇家遭水厄

米芾書史

元章好古過人書畫驚世起余作歌

天下愛奇人沒量奇不諛人奇解相奇人奇物方合璧
乞與世閒人物樣六朝唐盛始兼得訪古知名已蕭爽
人亡物喪付衰夢注想後來逢好尚元章心自鑒秋月
一路仍行九霄上家時菜色無斗粟書畫奇奇世人望
譬如大海沈百寶爾輩乘風得之浪二王褚陸已天作
老顧如來更天匠其餘緹襲凡幾重但見光明爛垂象
珍犀瑞錦扶蘭茝龍躍鸞驚訶魍魎金仙詎敢觸以手
雪子玉人聊置掌余家僻素最沈著退舍還師覺難傍

世人往往力能幹未免目蝦終惚恍絨機偽謬各臣妾
未覩堂堂筆中王袖閒溫縮氣如線淨几明窓謾瞻仰
從來所有萬錢價不即臭帑當火葬傾心妙絕豈求勝
妄意臨摹湏殺謗端居自號書一品好事如封繪三藏
諸郎青出即護持未肯充飢謬為駟書史載薛道祖詩
云寧聲動破千金
寶是也余衰二物擬高閣子可專之世無兩書來詩往但
悠悠塵土欺人正惆悵米芾畫史

題韓溪在陝蜀路閒蕭鄴侯追淮陰侯處

豪傑相從意氣中，憐才傾倒獨蕭公。
後來可是無奇客。

東閣投名尚不通。

許彥周詩話

龍崆巖

蒼巖如堂石如踞，橋梁如繩水如布。
不有樵夫踏破雲，世閒那得知其處。

天王寺

金碧為家定化城，書牀南偃畧相迎。
人閒蜨夢正深黑，天上木魚初發明。
半里好風招隱士，一枝枯竹助閒行。

已慙懷紱無高致可更標門著姓名

以上括蒼彙紀

遊麻姑山

謝公好登山折屐第三谷麻姑乃不到頗負登山足寒
杉鳴古璫澗道瀉淙玉筇竹白接羅吾將追往躅

溪行爰宛轉石坐憐皴蒼白雲起目前如鶴兩翼張蛻
我衣上塵駕之以翱翔欲攬恍不接身在意飄揚

石鼓埋入地荆壁飛上天鳴呼魯公碑風雨三百年爰
字不爰石磨滅安得傳不敢手觸之謂是甘棠篇

麻姑集

朱服

服字行中烏程人熙寧六年進士哲宗朝歷中
書舍人禮部侍郎徽宗朝加集賢殿修撰知廣
州黜知袁州再貶蘄州安置子或有萍洲可談
董斯張吳興備志萍洲老圃或自號也在黃州
蓋其僑寓之地事見齊安志或字無或

過廬州

昔年吳魏交兵地今日承平會府開沃壤欲包淮甸盡
堅城猶抱蜀山迴柳塘春水藏舟浦蘭若秋風教弩臺

獨有無情原上草青青還入燒痕來
方輿勝覽

九日

一見黃花只自羞蕭然短髮不禁秋誰人為整烏紗帽

獨倚西風滿眼愁
後村千家詩

句

西清邇英閣密勿侍經筵晝漏逾三鼓宸居近五軌多

聞資學殖清問發真筌
元豐盛事 合璧事類後集

孤臣正泣龍鬚草遊子空簪鳳尾花

朱或萍洲可談先公崇寧元年帥廣正月遊蒲
澗見遊人簪鳳尾花作口號一聯云云蓋以被
遇先朝自傷流落後監司乃指此句為罪其誣
注云契勘正月十二日哲宗皇帝已大祥豈是
孤臣正泣之時鞠獄竟無他意譏口可畏如此
宋史本傳服知廣州哲宗既祥服賦詩有孤臣
正泣龍鬚草之句為部使者所上黜知袁州

葛書思

書思字進叔密之子熙寧六年進士官朝奉郎

卒特謚清孝

喜子勝仲登第

廣場筆陣數千人喜汝穿楊箭鏃親慶緒綿長時幸會
文科興復事還新昔年繼榜熙寧歲今寓同登紹聖春
從此莫教書種斷孫曾應復值昌辰

韻語陽秋

丁注


注字葆光吳興人熙寧六年進士知永州有丁

永州集

永慶寺二覽亭

插迴飛簷聳凌虛疊砌危四天欄下揖萬象掌中窺目

力不到處雲容無盡時
塵塵看勝事
凭檻幾人知
赤城



宋詩紀事卷二十五